

## DANIEL

### *Daniel hoi a huinaw e yuemnae*

<sup>1</sup> Judah siangpahrang Jehoiakim a bawinae a kum thum nah, Babilon siangpahrang Nebukhadnezar ni Jerusalem kho a thosin teh, king a kalup.

<sup>2</sup> BAWIPA ni Judah siangpahrang Jehoiakim hoi bawkim dawk e hnopainaw a tangawn hah Nebukhadnezar kut dawk a poe. Nebukhadnezar ni a man e naw hah, Babilon kho kaawm e amamae bawkim thung a hrawi teh, hnopainaw hah hnopai im dawk a hruék aw h.

<sup>3</sup> Hat toteh, siangpahrang ni tuenlanaw dueng daw k kacuelah kaawm e Asphenaz hah a kaw teh,

<sup>4</sup> Isarelnaw man e naw thung daw k hoi, a takthai kahawi e, a mei kahawi e, kamtu thai e, a lawkdei kahawi e, panuenae daw k a hue karang e naw hoi, siangpahrang im daw k thaw taw k han kamcu e nawsainaw hah na rawi han. Hahoi, Khaldean ca hoi lawk hah na cangkhai han atipouh.

<sup>5</sup> Siangpahrang e rawca hah kum thum totouh hnintangkuem paca hnukkhu, siangpahrang im thaw a taw k aw h han.

<sup>6</sup> Hotnaw thung daw kvah, Judah tami Daniel, Hananiah, Mishaél, hoi Azariah tinaw a kâpa aw h.

<sup>7</sup> Tuenla e naw kaukung ni, ahnimanaw hah a min koug athung pouh. Daniel hah

Belteshazzar, Hananiah hah Shadrak, Mishael hah Meshak, Azariah hah Abednego atipouh awh.

<sup>8</sup> Daniel ni siangpahrang e rawca hoi misur canei e lahoi kakhin hoeh nahanelah, hot patet e rawca hah na paca hanh loe telah tuenlanaw kaukkung koe a kâhei.

<sup>9</sup> Cathut pahren lahoi tuenlanaw kaukkung ni Daniel hah a pahren eiteh, ka bawipa ni nangmae rawca mitkhet hanelah, a hruek e hah kai hai ka taki van.

<sup>10</sup> Ahni ni nouh nangmouh hanlah raw-carawnei naw hah a hmoun. Nangmae minhmai teh alouke nawsainaw e minhmai patetlah a meihawi hoeh e hah ka bawipa ni hmawt pawiteh, nangmouh kecu dawk kai teh ka lahuen a thawk toe, telah Daniel koe a dei pouh.

<sup>11</sup> Hattoteh Daniel ni, Daniel, Hananiah, Mishael, Azariah tinaw ka khenyawn hanelah tuenlanaw kaukkung ni a hruek e rawca mitkhenkung koevah,

<sup>12</sup> kaimouh hanelah rawca hah anhla hoi tui maha hnin hra touh thung na poe na teh na tanouk haw.

<sup>13</sup> Hathnukkhu kaimae minhmai hoi siangpahrang rawca ka catnet e nawsainaw e minhmai hah khen nateh na hmu e patetlah thaw tawk haw atipouh.

<sup>14</sup> Rawca mitkhenkung nihai, a lungkuep teh hnin hra touh a tanouk.

<sup>15</sup> Hnin hra touh akuiep toteh, ahnimae minhmai teh rawca ka catnet e nawsainaw e minhmai hlak a meihawi aw haw, phuekuek lah ao aw haw.

<sup>16</sup> Hat toteh, rawca mitkhenkung ni ahnimouh hanelah, a hmoun e rawca hoi misurtui hah a takhoe teh anhla hoi duengdoeh a kawk toe.

<sup>17</sup> Cathut ni hote nawsainaw pali touh hah panuenae, ca thournae hoi kamtu e pueng thom thainae hah a poe. Daniel teh vision hoi mangnaw pueng hai a panue thai.

<sup>18</sup> Siangpahrang im a kâen nahane atueng khoe e akuep toteh, tuenlanaw kaukung ni nawsainaw hah a kaw teh siangpahrang im thung a kâenkhai.

<sup>19</sup> Siangpahrang ni hote nawsainaw a pacei pakaw hnukkhu Daniel, Hananiah, Mishael, Azariah tinaw hoi kâvan e buet touh hai ao awh hoeh dawkvah, ahnimanaw teh, siangpahrang koe thaw tawk hane kâ a hmu awh.

<sup>20</sup> Siangpahrang ni a pacei e panuenae puenghoi thomthainae pueng dawkvah, a ram thung kaawm e mitpaleikathoum e, kut khet ka thoum e naw pueng hlak let hra touh hoi a thoum awh e hah a hmu.

<sup>21</sup> Daniel teh Sairas siangpahrang a bawinae apasuek kum totouh ao.

## 2

### *Nebukhadnezar e mang*

<sup>1</sup> Nebukhadnezar a bawinae a kum pahni navah, a mang lah a hmu e hno dawkvah roumkalue teh ip thai hoeh.

<sup>2</sup> Hat toteh, siangpahrang ni a ram thung kaawm e mitpalei kathoumnaw, kutkhetkathoumnaw, kahrai ka pâlei thainaw

hoi, Khaldeannaw hah pâkhueng aw h ati e patetlah ahnimanaw a tho aw h teh,

<sup>3</sup> siangpahrang ni ka mang lah ka hmu e hah bang ngainae ne, ka panue thai hoeh dawkvah, ka lung nawm hoeh, dei aw h haw atipouh.

<sup>4</sup> Hatnavah Khaldeannaw ni Aramaih lawk lahoi, siangpahrang na hring saw seh. Kaimouh koe na mang hah rui haw. Kaimouh ni na mang teh ka leh aw h vai nei atipouh aw h.

<sup>5</sup> Siangpahrang ni yo ka dei toung hat tayaw. Hote mang hoi a ngainae na dei thai aw h hoehpawiteh, tawntarawn lah na tâtueng aw h han. Na imlaw naw hai vaipuen songnawng lah ka coung sak han atipouh.

<sup>6</sup> Mang hoi deingainae na deicai pawiteh, poehnonaw, tawkphunaw hoi barinae kalen a hmu han. Hatdawkvah, mang hoi deingainae hah kai koe dei aw h telah Khaldean a lungkaang-naw koe atipouh.

<sup>7</sup> Ahnimanaw ni, siangpahrang, na mang hah kaimouh koe dei haw, kaimouh ni ka leh aw h vainei bout atipouh aw h.

<sup>8</sup> Hat toteh, siangpahrang ni yo ka dei toung hatayaw. A hnin thapa asaw nahanelah atueng tahruet sak hane doeh na ngai aw h tie ka panue.

<sup>9</sup> Mang hah na dei aw h hoehpawiteh, pouk-nae buet touh duengdoeh kaawm. Atueng kasaw nakunghai, laithoe hrawnghrang doeh dei hanelah na kâcai aw h toe. Mang hah bout deih aw h. Hottelah na dei thai aw h pawiteh, leh hai na leh thai aw h han tie ka panue bout atipouh.

<sup>10</sup> Khaldeannaw ni, siangpahrang nang ni na dei e patetlah ka dei thai hane tami buet touh

boehai awm hoeh. Bangpatet e siangepahrang ni hai a lentoe eiteh, mitpaleikathounaw, camkathounaw, Khaldean taminaw koe hettelah pacei boihoeh.

<sup>11</sup> Siangepahrang nang ni na pacei e teh, ka ru poung e hno doeh. Tami lah kaawm hoeh e Cathut hloilah apinihai pâpho thai mahoe h bout atipouh aw h.

<sup>12</sup> Hote lawk hah a thai navah, puenghoi a lungkhuek teh, Babilon kho daw k kaawm e tami lungkaangnaw pueng koung thei lah awmseh telah kâ a poe.

<sup>13</sup> Hat toteh, hote kâ hah a pathang aw h teh, a lungkaangnaw thei a kamtawng aw h teh, Daniel hoi a huinaw hah thei hanlah a tawng aw h.

### *Nebukhadnezar mang pâphona e*

<sup>14</sup> Daniel ni bangkongmaw siangepahrang e kâ teh, hettelah totouh a rang vaw telah,

<sup>15</sup> Babilon tami lungkaangnaw thei hanlah ka cet e naw kahrawikung, siangepahrang ka ring e Ariok koe kâhruetcu et laihoi a pacei.

<sup>16</sup> Ariok ni hote konglamnaw hah a dei navah, Daniel ni siangepahrang im a kâen teh, hote mang deicai nahanelah atueng na poe ei telah a kâhei.

<sup>17</sup> Hahoi ama im a ban teh, hote akongnaw hah a huinaw Hananiah, Mishael, Azariah tinaw koe a dei pouh.

<sup>18</sup> Hat toteh, maimouh teh alouke Babilon a lungkaangnaw hoi reirei due aw h hoeh nahanelah, hete hrolaw k daw k lungmanae coe aw h nahan, kalvan Cathut koe ratoum aw h sei ati aw h.

19 Karum toteh Cathut ni vision lahoi, hote hrolawk hah Daniel koe a dei pouh.

20 Hat toteh, Daniel ni kalvan Cathut e lungmanae hah a pholen teh, Cathut min teh a yungyoe hoi a yungyoe ditouh pholen lah awmseh. Lungangnae hoi hnotithainae hoi akawi.

21 A tue hoi khotue naw hah a kâthung sak. Siangpahrangnaw hai a pabo, a tawmtakhang, a lungkaang e naw koe lungangnae na poe. Kho ka pouk thai naw ni hai na lungmanae daw k hoi doeh a panue thai awh.

22 Ka ru e hnonaw hai kamcengcalah, na patue awh. A hmonae koe kaawm e pueng na panue teh, nama koe angnae teh ao.

23 Mintoenaw e Cathut, hnotithainae hoi lungangnae na poe teh, kaimouh ni ka ratoum awh e patetlah siangpahrang e a mang pâpho thainae lungangnae teh ka pholen telah Daniel ni a ratoum.

### *Nebukhadnezar e mang deicainae*

24 Hathnukkhu Babilon lungkaangnaw thei hanlah a patoun e Ariok koe a cei teh, Babilon tami lungkaangnaw hah thet hanh. Kai hah siangpahrang koe na thak haw. Kai ni mang hoi deingainae hah ka pâpho pouh vainei atipouh.

25 Hat toteh, Ariok ni Daniel hah karanglah siangpahrang koe a hrawi teh, siangpahrang, nange mang hoi deingainae ka pâpho thai e tami Judahnaw man e thung daw k e buet touh ka hmu toe atipouh.

26 Siangpahrang ni kai ni ka mang e mang hah dei vaiteh deingainae hah na pâpho thai han

maw telah Belteshazzar tie Daniel hah a pacei navah,

<sup>27</sup> Daniel ni siangpahrang, nang ni na pacei e hah a lungkaangnaw, camkathoumnaw, mit-paleikathoumnaw, hoi khueyuenaw ni pâpho thai mahoe.

<sup>28</sup> Hro e naw ka pâpho niteh, ato hmalah ka tho hane naw siangpahrang nang koe ka dei pouh e Cathut buet touh duengdoeh kalvan vah kaawm

<sup>29</sup> Oe siangpahrang, na i navah ato hmalah ka tho hane naw hah na pouk. Hro e naw kapâphokung Cathut ni ato hmalah ka tho hane naw hah nang koe na patue.

<sup>30</sup> Hete hro e hno hah, kai teh alouke moithangnaw hlak hoe ka lungang dawkvah kai koe a pâpho e nahoe. Nang ni na lungthung na pouk e naw hah na panue thai nahanlah doeh deingainae naw hah Cathut ni na pâpho pouh.

<sup>31</sup> Siangpahrang, na i lahun nah na mang e vision teh, na khet navah meikaphawk hah na hmu. Athakaawme lah ao. Hote meikaphawk teh, taki ka tho e meilam hoi na hmalah a kâpâhung.

<sup>32</sup> A lû teh sui, a lungtabue hoi a kut roi teh ngun lah ao.

<sup>33</sup> A von hoi a phai roi teh, rahum lah ao. A khok buembue roi teh sum lah ao. Khoktabei hoi khoksampha teh sum atangawn amhru atangawn lah ao.

<sup>34</sup> Nang ni na khet lahun nah, kut hoi sak hoe e amahmawk kaawm e talung buet touh ni, meikaphawk e khok sum tangawn amhru

tangawn e koe a ten torei teh,

<sup>35</sup> sum, amhru, rahum, ngun, sui naw teh, reppasei lah ao. Kawmpoi vah, cangkatinnae koe e vaiphu patetlah ao nahan awm laipalah, kahlî ni a palek teh a kahma. Meikaphawk ka ten e talung a rounge teh, kalenpounge mon lah a coung. Talaivan pueng koung a ramuk telah mang na sak.

<sup>36</sup> Atuvah, mang ni deingainae na dei pouh vai.

<sup>37</sup> Siangpahrang, nang teh siangpahrangnaw e siangpahrang lah na o. Kalvan Cathut ni uknaeram, thasainae, hoi bawilenna na poe toe.

<sup>38</sup> Tami khosaknae hmuen pueng koe, saringnaw hoi kahlun e tavanaw pueng na kut dawke poe lah ao teh, abuemlahoi uknae kâ na tawn. Nang teh, meikaphawk e suilû lah na o.

<sup>39</sup> Nang hnukkhu lah, nang patetlah kalen hoeh e alouke uknaeram a tâco han. Hathnukkhu talai van pueng ka uk hane apâthum e rahum ram a tâco han.

<sup>40</sup> Apalinae uknaeram teh, sum patetlah kate e lah ao han. Sum teh alouke hno pueng a raphoe thai e patetlah apalinae ram ni raphoe vaiteh, a rektap han.

<sup>41</sup> Kutsak e khoktabei hoi khoksamphanaw teh, sum tangawn amhru tangawn lah ao e hah na hmu e patetlah, buet touh hoi buet touh kâtaran e uknaeram lah ao han. Hatei, amhru pâeng e hoi sum kalawt e na hmu e patetlah sum teh a tê han.

<sup>42</sup> Khokcareinaw teh sum tangawn amhru tangawn lah ao e na hmu e patetlah, uknaeram atangawn teh a tê han, atangawn teh a rawk a



yawi han.

<sup>43</sup> Amhru pâeng e hoi sum kalawt e hah na hmu e patetlah khocanaw teh ram alouknaw hoi a kâkalawt awh han. Hatei, amhru hoi sum a kâkalawt thai hoeh e patetlah buet touh hoi buet touh kâpo thai mahoe.

<sup>44</sup> Kut hoi sak hoeh e talung buet touh ni mon hoi amahmawk a kamlei teh, sum, rahum, ngun, sui, amhrunaw hah reppasei lah a ten e na hmu e hateh, rawknae koe ka phat thai hoeh e, hote bawinae tueng nah kalvan Cathut ni uknaeram a kangdue sak han. Hote teh Jentelnaw e kut dawak phat tounge laipalah, ahmaloe dei tangcoung e ram pueng hah raphoe vaiteh, a yungyoe a cak han.

<sup>45</sup> Hottelah, ato hmalah ka tho hane hnouaw hah ka lentoe poung e Cathut ni siangpahrang nang koe a dei e doeh. Nange mang teh, katang e doeh. Deicainae hai kahman e doeh telah Daniel ni a dei pouh.

### *Daniel poehno poenae*

<sup>46</sup> Hattoteh siangpahrang ni Daniel hmalah a tabo teh barinae a poe. Hmuitui hmaisawi hane hoi pasoumhno pasoung hanelah kâ a poe hnukkhu,

<sup>47</sup> nang ni hete hrolawak hah na pâpho thai dawkvah, atangcalah nange Cathut teh, cathutnaw e Cathut, siangpahrangnaw e Bawi, hrolawak ka pâpho thai e Bawipa doeh telah a ti.

<sup>48</sup> Hat toteh, Daniel hah thaw a luen sak teh, hnopai moikapap a poe hnukkhu, Babilon ram dawak bawi lah thoseh, Babilon lungkaangnaw kaukkung bawi lah a ta.

<sup>49</sup> Hat toteh, Daniel ni a kâhei e patetlah siangpahrang ni, Shadrak, Meshak, hoi Abednego tinaw hah Babilon ram thung thaw katawkkung lah a ta. Hatei, Daniel teh siangpahrang im vah a tahung.

### 3

#### *Sui meikaphawk*

<sup>1</sup> Vai touh teh, Nebukhadnezar siangpahrang ni a rasang dong 60, akaw e dong taruk touh e sui meikaphawk a sak teh, Babilon ram Dura yawn dawk a pâhung.

<sup>2</sup> Siangpahrang ni a pâhung e meikaphawk hnawngnae pawî koe kâ katawnkungnaw, khobawinaw, pouknae kapoekungnaw, hnopai kakuenkungnaw, lawkcengkungnaw, hoi alouke khobawinaw pueng teh, kamkhueng sak hanelah kâ a poe.

<sup>3</sup> Hatdawkvah kâ katawnkungnaw, khobawinaw, pouknae kapoekungnaw, hnopai kakuenkungnaw, lawkcengkungnaw hoi alouke khobawinaw pueng teh, a tho awh teh meikaphawk hmalah a kangdue awh.

<sup>4</sup> Hatnavah miphun phunkuep hoi lawk phunkuep e taminaw,

<sup>5</sup> Mongka, vovit, ratoung, cecak, tamawi, ratoung kalen hoi lawk ka tâcawt e pueng tumkhawng lawk na thai awh toteh, Nebukhadnezar ni a pâhung e sui meikaphawk hah tabo laihoi na bawk awh han.

<sup>6</sup> Apipatethai tabo laihoi ka bawk ngai hoeh e teh, sut kamtawi e tahmanghmai dawkhawng phum lah awmseh, telah kacaipounglah a oung awah.

<sup>7</sup> Hatdawkvah, mongka vovit, cecak, ratoung, tamawi, ratoung kalen e hoi lawk ka tâcawt e pueng tumkhawng lawk tami pueng ni a thai awah toteh, miphun phunkuep hoi lawk phunkuep e taminaw pueng ni a tabo awah teh, Nebukhadnezar siangpahrang ni a pâhung e sui meikaphawk teh a bawk awah.

*Daniel e huinaw ni lawk eknae*

<sup>8</sup> Hatnavah Nebukhadnezar siangpahrang koe Babilonnaw a tho awah teh,

<sup>9</sup> Siangpahrang na hring dung vang seh,

<sup>10</sup> mongka vovit, cecak, ratoung, tamawi, ratoung kalen e hoi lawk ka tâcawt e pueng tumkhawng lawk ka thai e pueng ni, sui meikaphawk hah tabo laihoi a bawk awah han.

<sup>11</sup> Ka tabawkhawng hoeh e, ka bawkhawng hoeh e teh kamtawi lahun e tahmanghmai dawkhawng phum lah ao han telah na pathang toe.

<sup>12</sup> Siangpahrang nangmouh ni, Babilon ram thung kahrawikung thaw na poe e Shadrak, Meshak, hoi Abednego tinaw ni na pathang e lawk hah banglahai ngâi awah hoeh. Nange cathutnaw hai bawk awah hoeh. Na pâhung e sui meikaphawk hai bawk awah hoeh, telah Judahnaw yonpennae a dei pouh awah.

<sup>13</sup> Hat toteh, Nebukhadnezar siangpahrang teh puenghoi a lungkhuek dawkvah, Shadrak, Meshak, hoi Abednego tinaw kaw awah atipouh e patetlah siangpahrang hmalah a tâcokhai awah.

<sup>14</sup> Nebukhadnezar siangpahrang ni, hei Shadrak, Meshak, hoi Abednego, kaie cathutnaw hah na bawk awh hoeh maw. Ka pâhung e sui meikaphawk hah na bawk awh hoeh maw.

<sup>15</sup> Atuvah mongka vovit, cecak, ratoung, tamawi, ratoung kalen e hoi lawk ka tâcawt e pueng tumkhawng lawk na thai awh toteh, ka pâhung e sui meikaphawk hah bawk hannah coungkacoe lah awm awh. Hoehpawiteh, kamtawi lahun e tahmang hmai dawk tang na phum awh han. Ka kut dawk hoi na kahlout sak hane cathut teh bangpatet e cathut mouh kaawm atipouh.

<sup>16</sup> Shadrak, Meshak, hoi Abednego tinaw nihai, oe! siangpahrang Nebukhadnezar, hete kong dawk kaimouh ni bout dei hane banghai awmhoeh.

<sup>17</sup> Kaimouh ni ka bawk awh e Cathut ni ka kamtawi lahun e tahmang hmai dawk hoi na hlout sak thai. Nange kut dawk hoi hai na hlout sak thai han.

<sup>18</sup> Hottelah na kahlout sak hoeh nakunghai, nange cathutnaw teh ka bawk awh mahoe. Na pâhung e sui meikaphawk hai ka bawk awh mahoe, bout atipouh.

### *Tahmanghmai dawk tâkhawngnae*

<sup>19</sup> Hat toteh, Nebukhadnezar teh a lung hoe a khuek teh Shadrak, Meshak, hoi Abednego tinaw a khet navah a minhmai a mathoe dawkvah tahmang hmai hah ahmaloe e hlak let sari touh kamtawi sak hane hoi

<sup>20</sup> a thakasai e ransanaw koe Shadrak, Meshak, hoi Abednego hah katek vaiteh kamtawi lahun e tahmang hmai dawk phum hanelah kâ a poe.

<sup>21</sup> Hattoteh ahnimouh kathum touh hah, khohna khuehoi, hnicu khuehoi, luhuem khuehoi a katek awh teh kamtawi lahun e tahmang hmai dawk a phum awh navah,

<sup>22</sup> siangpahrang e kâpoe e teh ekvoi a rang teh, patawi e tahmang hmai koe ekvoi a bet dawkvah, Shadrak, Meshak, hoi Abednego tinaw hmai kaphumkungnaw law teh a bet lawi a due awh.

<sup>23</sup> Ahnimouh kathum touh teh puenghoi kamtawi e tahmang hmai dawk ao awh.

<sup>24</sup> Hattoteh siangpahrang Nebukhadnezar teh kângairu laihoi hluet a thaw teh, tami kathum touh nahoehmaw katek laihoi hmai phum awh vaw telah kâpankhaikungnaw hah a pacei. Ahnimouh ni hai awiyaw atipouh awh.

<sup>25</sup> Siangpahrang ni tami pali touh teh, katek laipalah hmai dawk a kâhlumkâhlai awh. Runae dawk hoi a hlout awh e hah ka hmu bo vaw. Apali e teh Cathut capa boiboe bo aw atipouh hnukkhu,

*Tahmanghmai dawk hoi tâconae*

<sup>26</sup> kamtawi lahun e tahmang hmai koe rek a cei teh, ka rasang poun e Cathut e sannaw, Shadrak, Meshak hoi Abednego tinaw tâcawt awh nateh, tho awh leih, atipouh navah ahnimouh teh hmai thung hoi a tâco awh.

<sup>27</sup> Kâ katawnkungnaw, pouknae kapoekungnaw, ransa bawinaw, hoi khobawinaw ni hmai ka kang thai hoeh e ahnimanaw hah a kalup

awh teh a khet awh. Ahnimae samrui buet touh boehai kamrâw hoeh. Khohna hai kamlang hoeh. Hmai kak hmui hai tho hoeh.

<sup>28</sup> Nebukhadnezar siangpahrang ni Shadrak, Meshak, hoi Abednego tinaw e Cathut teh pholen lah awmseh. Ahnimae Cathut hloilah alouke cathut a bawk awh hoeh nahanlah Cathut kâuep laihoi siangpahrang e kâ a ek awh teh, a kâhmoun awh e naw koe Cathut ni kalvantami a patoun teh a rungngang toe.

<sup>29</sup> Hatdawkvah lawk phunkuep kapan e tami phunkuep thung dawk e buetbuet touh ni Shadrak, Meshak, hoi Abednego tinaw ni a bawk e Cathut dumdamnae lawk dei pawiteh, tawntarawn tâtueng lah awmseh, ahnimae im haiyah vaipuen songnawng lah awmseh telah a pathang. Bangkongtetpawiteh, hettelah hluk e hloutnae hah hote Cathut hloilah bangpatet e cathut ni hai coung thai hoeh ati hnukkhu,

<sup>30</sup> Babilon ram dawk Shadrak, Meshak, hoi Abednego tinaw hah a thaw a luen sak pouh.

## 4

### *Nebukhadnezar ni Cathut a pholen*

<sup>1</sup> Kai Nebukhadnezar ni lawk na patawn awh. Talaivan kho tangkuem kaawm e miphun cawngca hoi lawk cawngca kapan e taminaw nangmouh koe lungmawngnae pungdaw seh.

<sup>2</sup> Lathueng poung lah kaawm e Cathut ni kai dawk a sak e kângairu hno hoi mitnoutnae naw hah kamnue sak hanelah ka ngai.

<sup>3</sup> Mitnout teh a len tangngak. Athaonae teh kângairu han lah ao tangngak. A uknaeram teh catounawtoun totouh kangning e lah ao.

*Nebukhadnezar e mang pahni*

<sup>4</sup> Kai Nebukhadnezar teh kama e siangpahrang im dawk tawnta bawirengnae hoi ka o navah,

<sup>5</sup> takikathopounge mang ka mang e hah ikhun dawk ka yanna koehoi ka pouk navah, ka taki toungloung.

<sup>6</sup> Hatdawkvah ka mang leh hanelah Babilon ram e a lungkaang e pueng ka hmalah koung thokhai aw h titeh ka pathang.

<sup>7</sup> Hatnavah, mitpaleikathoumnaw, kutkhetkathoumnaw, Babilon kacangkhaikung-naw, hoi Khaldeannaw pueng a tho aw h teh, ka mang hah ka dei pouh. Hatei, ahnimanaw ni ka mang hah let thai aw h hoeh.

<sup>8</sup> A hnukkhu vah, kaie cathut min ka phawt e Belteshazzar telah phung teh, Cathut e kathoung muitha hoi kakawi e Daniel ni kai koe a tho torei teh,

<sup>9</sup> mitpaleikathoumnaw kahrawikung Belteshazzar nang daw k kathoung e Cathut Muitha ao tie thoseh, hrolaw k kaawm e pueng na pâpho thai e hai thoseh ka panue. Hatdawkvah, mang ka mang e hah na pâpho pouh haw.

<sup>10</sup> Ka ikhun daw k ka yan nah ka hmu e vision teh, talai lungui vah, karasangpoung e thingkung buet touh a kâung.

<sup>11</sup> Hote thingkung teh a roun g teh a thao poung. Kalvan a deng teh, talai van pueng koehoi hmu e thai e lah ao.

12 A hna hai a meihawi. Moithang pueng ni ca khuem hane paw hoi akawi. Talai e saringnaw teh hote thingkung tâhlip dawk a kâhat awah, tavanaw ni a kangnaw dawk a kâhat awah.

13 Ka ikhun dawk ka yan lahun nah ka hmu e vision teh bout ka khet navah, thingkung ka ring e tami kathoung buet touh kalvan hoi a kum.

14 Thingkung hah tâtueng haw. Akangnaw hah rabat haw. A hna, a pawnaw hah pahroe haw. Saringnaw ni thingkung rahim hoi tâcawt awah naseh. Tavanaw hai akangnaw dawk hoi tâcawt awah naseh.

15 Hateiteh, a tangpha hoi a thongmui teh pâhlung haw. Sumrui, rahum rui hoi pâkhit nateh, hram kanaw um vah awm naseh. Kum sari touh thung khoraum ao vaiteh, saringnaw hoi cungtalah hram cat naseh.

16 Tami lungthin kahmat naseh. Saring lungthin tawn naseh.

17 Bangkongtetpawiteh, a Lathueng Poug e Cathut ni talai uknaeram a uk tie thoseh, a poe ngai e tami koe a poe tie hai thoseh, ka rahnoum poung e tami hah a tawm teh ram hah a poe tie hai thoseh, moithangnaw ni a panue thai nahanlah thingkung karingkungnaw ni hettelah a sak awah toe. Tami kathoung naw ni kâ a poe toe telah a ti.

18 Hottelah Nebukhadnezar siangpahrang ni mang ka mang toe. Nang Belteshazzar ka hmu e mang hah atuvah na deicai pouh haw. Kaie uknaeram dawk e a lungkaangnaw ni decai thai awah hoeh eiteh, nang teh kathoung Cathut



Muitha hoi na kawi dawkvah, na pâpho thai telah ka hmu e mang hah Daniel koe ka dei pouh.

### *Mang deingainae*

<sup>19</sup> Hat toteh, Belteshazzar telah phung e Daniel teh, suimilam buet touh hane muen a kângai teh a lungpuen. Siangpahrang ni, nang Belteshazzar, mang hoi deingainae dawk na lungpuen sak hanh atipouh. Belteshazzar ni Bawipa, nang na kahmawt ngai hoeh e naw koe mang deingainae teh phat lawiseh.

<sup>20</sup> Na hmu lahun nah karoung niteh, a tha kaawm poug e, kalvan ka deng niteh, talai van puenghoi hmu thai e,

<sup>21</sup> a hna hai a meikahawi niteh, moithang pueng ni cakhuem e a paw hoi kakawi e, talai e saringnaw ni a rahim vah ao aw h teh, tawanaw ni a kang daw kâhatnae thingkung hateh,

<sup>22</sup> Bawipa nang nama roeroe doeh toe. Nang teh na roun, thaonae hoi na kawi. Lentoe tawntanae teh kalvan kadeng lah ao. Kâ na tawnae teh talai pout totouh a pha.

<sup>23</sup> Thingkung ka ring e tami kathoung buet touh kalvan hoi ka kum niteh, thingkung hah tâtueng nateh raphoe haw. Hatei a tangpha hoi a thongmui hah pâhlung nateh, sumrui, rahumrui hoi katek nateh, hram kanaw um vah awm naseh. Kum sari touh thung khoraum awm naseh. Talai e saringnaw hoi rei awm naseh tie teh,

<sup>24</sup> A lathueng poug e Cathut ni siangpahrang nang koe a pha sak e mang deicainae teh,

<sup>25</sup> Nang hah tami um hoi na pâlei teh, talai saringnaw hoi reirei na o han. A Lathueng Poug e Cathut ni telah uknaeram hah a uk dawkvah, poe a ngai e taminaw koe a poe e hah na panue hoehnahlan kum sari touh thung maito patetlah hram na ca vaiteh, khoraum na o han.

<sup>26</sup> Thing tangpha, thingthawngmui a pâhlung e teh, Kalvan ni a uk tie na panue hnukkhu, uknaeram hateh, na kut dawк bout poe lah ao han.

<sup>27</sup> Hatdawkvah siangpahrang kaie lawk hah thai haw. Na tawnta e kasaw lah kangning thai nahan, na yonnae hah lannae lah, na hawihoehnae hah roedengnaw pahrennae lah let palang leih telah atipouh.

### *Nebukhadnezar kârahnoumnae*

<sup>28</sup> Hote hnopueng Nebukhadnezar siangpahrang koe a phanae kong teh hettelah ao.

<sup>29</sup> Thapa yung 12 apoutnae dawк siangpahrang teh, Babilon im vah a kâhlai.

<sup>30</sup> Siangpahrang ni, hete khopui teh, ka ram a kamtuenae, ka bawilen taluenae tawm nahanlah ka bahu hoi ka sak e Babilon khopui nahoehmaw telah a ti.

<sup>31</sup> Hote lawk a dei lahunnah, kalvan hoi ka tho e lawk teh Oe, Nebukhadnezar siangpahrang, thai haw. Na uknaeram teh na kut dawк hoi takhoe lah ao toe.

<sup>32</sup> Nang hah taminaw umsali hoi na pâlei vaiteh, talai saringnaw hoi reirei na o han. A Lathueng Poug ni talai uknaeram hah a uk teh, a poe ngai e tami a poe e hah na panuehoenae

tueng, kum sari touh thung maito patetlah hram na ca han telah a ti.

<sup>33</sup> Hote lawk patetlah Nebukhadnezar dawk vaitalahoi a tho teh, tami umsali hoi a pâlei aw. Maito patetlah hram a ca teh, khoraum vah ao. A takmuennaw teh mataw rathei patetlah ao teh, a khokpatinnaw teh tava khokpatin patetlah ao pouh.

### *Nebukhadnezar ni Cathut pholennae*

<sup>34</sup> Atueng akuep toteh, kai Nebukhadnezar teh kalvan lah ka mounng navah, bout ka kâpanue teh, a yungyoe kahring e Cathut hah ka pholen, barinae ka poe teh, ka lentoe sak. Kâ tawnae teh a yungyoe e doeh. A uknaeram teh a yungyoe a kangning.

<sup>35</sup> Talai tami pueng teh, banghai bang hoeh lah ao aw. Kalvan ransanaw koehai thoseh, talai taminaw koehai thoseh, a ngai e patetlah a sak. Apinihai a kut hah ngang thai aw hoeh. Bangmouh na sak ka tet pouh thai e apihai awm hoeh.

<sup>36</sup> Hat toteh, ka lungthin amahmoe lah bout ao. Kaie uknaeram bawilennae nahanlah bari onae hoi, raimonae teh kai koe bout a ban. Kho kapoukkungnaw hoi bawinaw ni bout na hnai aw teh, ka uknae casak lah ao teh, puenghoi taluenaehai ahmaloe e hlak hoe a len.

<sup>37</sup> Atuteh, kai Nebukhadnezar ni kalvan siang-pahrang hah ka pholen teh, ka tawm teh ka lentoe sak. Bangkongtetspawiteh, a sak e hno pueng teh a thuem, a lamthung teh a lan. Kâoup laihoi kho ka sak e pueng teh rahim lah a pabo tie hah kho tangkuem a pathang.

# 5

## *Belteshazzar pawitonaē*

<sup>1</sup> Belshazzar siangpahrang ni, a bawinaw 1,000 touh a kaw teh, ahnimouh hanelah pawī kalenpoung a to pouh teh, ahnimouh hoi misurtui rei a nei awh.

<sup>2</sup> Misur tui a patek navah Belshazzar ni, apa ni Jerusalem bawkim thung e a lawp e sui manang, ngun manangnaw dawḱ hoi, siangpahrang hoi a bawinaw, a yu hoi adonaw ni misurtui nei nahanelah thokhai awh telah kâ a poe.

<sup>3</sup> Hat toteh, Cathut e bawkim thung e a lawp awh e suimanangnaw hah a la awh teh, siangpahrang hoi a bawinaw, a yu hoi adonaw ni hote manangnaw hoi misurtui a nei na awh.

<sup>4</sup> Misur tui a nei awh teh, sui cathut, ngun cathut, rahum cathut, sum cathut, thing cathut, talung cathutnaw hah a pholen awh.

<sup>5</sup> Hatnae tueng nah, tami e a kutdawn a tâco teh, hmaiimkhok lathueng, siangpahrang im tapang dawḱ a kâthut teh, hottelah ka thut e kutdawn hah siangpahrang ni a hmu.

<sup>6</sup> Hattoteh siangpahrang mei det a kamlang teh, a khopouk a ru dawḱvah, a kenghru meimei doukkâlat lah ao teh, a khokpakhu thouk a kâkhawng pouh.

<sup>7</sup> Camkathoum e Khaldean taminaw hoi khueyuenaw hah kaw awh telah puenghoi a hram. Hote ca hah a touk vaiteh a ngainae ka dei thai e tami teh, hnipaling kâkhu sak han, sui dingyin a lahuen dawḱ awī sak han, uknaeram

thung vah apâthum e bawi, lawkcengkung lah ao han a ti.

<sup>8</sup> Tami kathoumthainaw pueng teh a tho aw. Hatei hote ca hah touk thai aw hoeh. A deingainae hai pâpho thai aw hoeh.

<sup>9</sup> Hatdawkvah, siangpahrang Belshazzar teh, khopouk aru lawi a mei det a kamlang teh, a bawinaw puenghai muen ati aw.

<sup>10</sup> Hat toteh, siangpahrangnu ni siangpahrang hoi a bawinaw e lawk a thai navah, pawihung a kâen teh, siangpahrang na hring saw seh. Na khopouk ru sak hanh. Na mei hai det kamlang sak hanh.

<sup>11</sup> Kathoung Cathut Muitha ni a okhai e tami buet touh na uknaeram thung vah ao. Na pa se navah, ahni teh cathutnaw e lungangnae patet e lungangnae hoi panuena e tawn e hah panue e lah ao. Na pa Nebukhadnezar siangpahrang roeroe ni ahni hah camkathoumnaw, mitpaleikathoumnaw, Khaldeannaw hoi khueyuenaw, kahrawikung lah a hruek toe.

<sup>12</sup> Bangkongtetpawiteh, mang let thainae, ka ru e lawknaw hoi hoe kahawi e muitha, hoi panuena e, hah siangpahrang ni Belteshazzar telah min a poe e Daniel dawkae hah panue e lah ao. Hote Daniel hah kaw pawiteh a let thai han doeh atipouh.

### *Tapang dawkae ca deingainae*

<sup>13</sup> Hattoteh Daniel hah siangpahrang hmalah a thokhai aw. Siangpahrang ni, apa ni Judah ram hoi a man teh a hrawi e sannaw thung dawkae bawkae Daniel nang maw.

<sup>14</sup> Nang teh Cathut Muitha ni na okhai teh, hoe kahawi e panuenae nang dawk ao tie kamthang ka thai toe.

<sup>15</sup> Hote ca hah touk vaiteh a ngainae hah dei haw titeh camkathoumnaw hah kakaw eiteh, ahnimouh ni dei thai awh hoeh.

<sup>16</sup> Nang ni na let thai, ka ru e lawk paceinae naw hai na dei thai telah ka thai tangcoung e patetlah nang ni hote ca na touk thai boilah, na let thai pawiteh, hnipaling na kâkhu vaiteh, na lahuen dawk sui dingyin na awi vaiteh, uknaeram thung apâthum e ukkung lah na o han atipouh.

<sup>17</sup> Daniel ni, na hno poe hane naw teh nang namae lah awmseh. Poe han na ngai e tawk-phunaw hah ayâ alouknaw maha poe yawkaw, hatei na hmalah hote ca hah ka touk vaiteh ka let vainei.

<sup>18</sup> Oe, siangpahrang Lathueng Poung e Cathut ni na pa Nebukhadnezar siangpahrang koe uknaeram, taluenae, bawilennae hoi barinae hah a poe.

<sup>19</sup> Taluenae a poe dawkvah, tami pueng mipun puenghoi lawk cawngca pueng ni a bari awh teh, a hmalah a pâyaw awh. Thei han a ngai e pueng a thei teh, pasai a ngai e pueng hah a pasai. Thaw luen sak a ngai e pueng a luen sak teh, pabo a ngai e pueng a pabo.

<sup>20</sup> A khopouk a rasang, a lungpata teh, kâoup hoi kho a sak. A bawilennae lah pouh lah ao teh, a bawitungkhung dawk hoi pabo lah ao.

<sup>21</sup> Taminaw koehoi pâlei lah ao teh, moithang lungthin a tawn sak. Lathueng poung Cathut ni taminaw e uknaeram lathueng kâ a tawn

dawkvah, a ngai e tami hah uknaeram a poe e hah a panue hoehroukrak lanaw hoi reirei a pawngpa teh maito patetlah pho a ca teh, khotui cupcup kayu lah ao.

<sup>22</sup> Hatei, a capa nang Belshazzar, nang ni hote hnonaw hah na panue eiteh na lungthin na ka rahnoum laipalah,

<sup>23</sup> Kalvan Bawipa hah na taran teh, bawkim thung e manangnaw hah na la sak teh, nama hoi na bawinaw hoi na yu hoi a donaw ni hote manang hoi misurtui na nei aw. Hahoi sui, ngun, rahum, sum, thing, talung hoi sak e cathut, kahmawt thai hoeh e, ka thai thai hoeh e hah na pholen aw. Hah na hringnae hoi na lamthung pueng ka kuenkung Cathut law teh pholen laipalah na o aw.

<sup>24</sup> Hatdawkvah kutdawn a patoun teh hote ca hah a thut sak.

<sup>25</sup> Hote ca teh; MENE, MENE, TEKEL, UP-HARSIN

<sup>26</sup> MENE tie teh, na uknaeram hah Cathut ni a parei teh, a pabaw toe.

<sup>27</sup> TEKEL tie teh, nang hah yawcu dawk na khing boteh na kuep hoeh toe.

<sup>28</sup> PERES tie teh, na ukneram heh kapek lah ao toe. Media hoi Persia koe poe lah ao toe telah Daniel ni a dei pouh.

<sup>29</sup> Hat toteh, Belshazzar siangpahrang ni a dei e patetlah Daniel hah hnipaling a kaku sak teh, a lahuen dawk sui dingyin a awi sak teh, a uknaeram dawk apathum e bawi lah ao telah kothung a kahlaiawai aw. Hah na oung aw.

<sup>30</sup> Hat hnin tangmin vah, Khaldean siang-

pahrang Belshazzar teh thei e lah ao.

<sup>31</sup> A kum 62 touh ka phat e Media tami Darius siangpahrang ni uknaeram hah a lawp.

## 6

### *Sendeknaw khu dawk Daniel tâkhawngnae*

<sup>1</sup> Darius siangpahrang ni a uknaeram thung thaw ka tawk hane 120 touh hoi hote bawinaw patuen ka hrawi hanelah bawi kathum touh hah a ngai e patetlah a rawi.

<sup>2</sup> Hote bawi kathum touh thung dawk Daniel teh bawi buet touh lah ao hloilah,

<sup>3</sup> bawinaw pueng hlak hai hoe kahawi e panuenae a tawn dawkvah, a ram buemlah ahni kut dawk koung poe sak han telah siangpahrang ni a pouk.

<sup>4</sup> Hat toteh, kahrawikungnaw hoi bawinaw ni Daniel dawk uknaeram hoi kâkuen e yonpen hane a tawng awh.

<sup>5</sup> Cathut thaw a tawk e hloilah alouke thawtawknae dawk maimouh ni a yonnae hmawt awh hoeh ati awh teh,

<sup>6</sup> Darius siangpahrang koe a kamkhueng awh. Siangpahrang na hring saw seh.

<sup>7</sup> Bawipa, nang koe hloilah alouke tami koe nakunghai, cathut koe nakunghai hnin 30 touh thung ka ratoum e tami teh, sendekku thung tâkhawng lah awmseh telah kâraphoe thai hoeh e kâ pathang sak hanelah uknaeram ukkung bawinaw, kho ukkung bawinaw, rahak lai ka deikungnaw hoi ukkung pueng ni lungkânging awh toe.



<sup>8</sup> Hatdawkvah, laideitâtueng e teh caksak haw. Medes Persia phung patetlah kâraphoe thai hoeh e tacikkin sin haw atipouh awh.

<sup>9</sup> Hatdawkvah, Darius siangpahrang ni laideitâtueng e teh kutnout a thut sin.

<sup>10</sup> Hote laideitâtueng e hah tacik a kin sin teh a pathang toe tie Daniel ni a panue ei, ama im a cei teh, imvan Jerusalem kho lah kangvawinae hlalangaw a paawng laihoi, meng ouk a sak e patetlah khok cuengkhuem laihoi hnin touh dawk vai thum touh a ratoum teh Cathut koe lunghawi lawk a dei.

<sup>11</sup> Hottelah Cathut koe a ratoum e hah bawinaw ni a kamkhueng awh teh, a hmu awh navah,

<sup>12</sup> siangpahrang koe a cei awh teh, siangpahrang nang koe hloilah, alouke tami koe nakunghai, cathut koe nakunghai, hnin 30 touh thung ka ratoum e tami teh sendek e khu thung tâkhawng lah awmseh telah kutnout na thut nahohmaw telah laideitâtueng e hah a pacei awh. Siangpahrang ni hai kâraphoe thai hoeh e Medes Persia phung patetlah bokheiyah atipouh.

<sup>13</sup> Bawinaw ni hai siangpahrang, Judah ram hoi na man e Judah tami Daniel ni siangpahrang banglahai ngaihoeh. Kutnout na thut teh na pathang e laideitâtueng e hai banglahai ngâi hoeh. Hnin touh dawk vai thum touh a ratoum atipouh awh.

<sup>14</sup> Hote lawk hah siangpahrang ni a thai navah puenghoi a kângai teh, Daniel a hlout thai nahan kanî a khup ditouh a kâpouk.

<sup>15</sup> Bawinaw teh siangpahrang koe bout a

kamkhueng awh teh, siangpahrang vai touh pathang tangcoun e laideitâtueng e teh Media Persia phung lah kâroephoe thai hoeh tie hah panuek khe, bout atipouh awh.

<sup>16</sup> Hattoteh siangpahrang ni kâ a poe e patetlah Daniel hah a thokhai awh teh, sendekku thung a tâkhawng awh. Siangpahrang ni Daniel koe, pout laipalah na baw k e Cathut ni nang teh na hlout sak seh atipouh.

<sup>17</sup> Lungphenpui hah a la awh teh, sendekku a khuem awh. Daniel e akong daw k bout pathuengpathainae ao hoeh nahanelah siangpahrang e kuthrawt hoi bawinaw e khuthrawt hoi a kin awh.

*Sendekku daw k hoi Daniel hloutnae*

<sup>18</sup> Hahoi, siangpahrang teh im lah a ban teh karum tuettuet rawca a hai. A hmalah ratoung tamawi hai tum sak hoeh. Ip hai ip thai hoeh.

<sup>19</sup> Atangtho amom a thaw teh sendekku koe karanglah a cei.

<sup>20</sup> Sendek khu koe a pha toteh, khuika laihoi Daniel hah a kaw teh, kahring Cathut e a san Daniel, nang ni pout laipalah na baw k e Cathut ni sendek runae koehoi na hlout sak thai maw atipouh.

<sup>21</sup> Daniel ni siangpahrang na hring dung vang seh.

<sup>22</sup> Ka Cathut ni a kalvantami a patoun teh, sendeknaw e a pahninaw hah a tabuem pouh. Hatdawkvah, kai teh sendek runae daw k hoi ka hlout. Bangkongtetpawiteh, kai teh Cathut hmalah kacueme lah ka o teh, nang koehai payonnae ka sak hoeh.

<sup>23</sup> Hat toteh, siangpahrang puenghoi a lung-hawi teh, Daniel hah sendekkhuhung hoi rasa hanelah kâ a poe.

*Daniel ni Cathut barinae*

<sup>24</sup> Hathnukkhu Daniel yon ka pen e naw hah, siangpahrang e kâ lahoi a kaw awh teh, a yuca abuemlahoi sendekkhuhung dawkhung a tâkhawng awh. Talai a pha hoehnahlan sendekkhuhung ni a hruhrawng pueng vekrasen lah a kei teh a ca awh.

<sup>25</sup> Hottelah hoi, talai van kho tangkuem kaawm e lawk cawngca, miphun cawngca pueng koe siangpahrang e kâ lahoi ca a thut teh, a patawn. Ca a thut e teh, nangmouh koe lungmawngnae pung seh.

<sup>26</sup> Kai ni ka uknaeram thung kaawm e nangmouh ni, Daniel ni a bawkhung e Cathut hah taket awh telah lawk tâtuengnae ka sak. Bangtelamaw tetpawiteh, hote Cathut teh, kahring e Cathut, a yungyoe kangning e Cathut lah ao. Aram teh rawk thai mahoe. A uknaeram hai a yungyoe a kangning han.

<sup>27</sup> A rungngang teh a hlout sak. Kalvan hoi talai van hai mitnoutnae, kângairunae hnonaw a tâco sak. Daniel hah sendek hnotithainae dawkhung hoi ka hlout sak e Cathut lah ao.

<sup>28</sup> Hottelah hoi Daniel teh, Darius a bawi nahai thoseh, Persia tami Sairas a bawi nahai thoseh, hawinae ka coe e lah ao.

## 7

*Daniel e vision*

<sup>1</sup> Babilon siangpahrang Belshazzar a bawinae apasuek kum vah, Daniel teh a i lahunnah, mang a sak teh vision a hmu e naw hah a thut e teh,

<sup>2</sup> Kai Daniel ni karum vah ka hmu e vision teh, kalvan takin pali touh koe e kahlînaw teh tuipei van vah buet touh hoi buet touh a kâhmang awh.

<sup>3</sup> Reikâvan hoeh e sarang pali touh teh tuipei thung hoi a tâco awh. Apasueke sarang teh sendek hoi a kâvan. Mataw rathei hai a tawn.

<sup>4</sup> Ka khet lahun nah ahnie ratheinaw teh koug a phawk pouh awh. Talai dawh hoi amahoima a kâtawm teh, tami patetlah khok hoi a kangdue teh, tami lungthin a tawn,

<sup>5</sup> Apâhni e sarang teh tavom hoi a kâvan. Avang lae khok hoi a kangdue teh, a kâko dawh nâhru kathum touh a rakoug. Thaw nateh a moi moikapap cat haw atipouh awh.

<sup>6</sup> Bout ka khet boteh, kaisi hoi kâvan e sarang buet touh a kamnue. A hnukthun vah rathei pali touh ao. Lû pali touh a tawn. Uknae kâ hai a tawn.

<sup>7</sup> Tangmin vah bout ka hmu e vision teh, a tha kaawm poung niteh, takikathopoung apalinae sarang teh a kamnue. Kalenpoung sumhâ a tawn. Vekrasen lah a kei a ca teh, a canawi e hah a khok hoi a coungroe. Ahni teh, ahmaloe e sarangnaw hoi kâvan hoeh. Ki hra touh a tawn.

<sup>8</sup> Hote kinaw hah ka khet lahunnah, kinaw e alungui vah, alouke ki buet touh bout a cawn. Hote kica e hmalah hmaloe e ki kathum touh teh a tangpha khuehoi phawk lah ao. Hote kica teh tami e mit patet e mit a tawn, puenghoi lawk dei thainae pahni hai a tawn.

*Ayan e taminaw kamnuenae*

<sup>9</sup> Ka khet lahun navah, bawitungkhungnaw hah ka hmu. A kum kacue e buet touh a tahung. A khohna e teh tâmai patetlah a pangaw. A sam teh tumuen patetlah a pangaw. Tungkhung teh hmaito lah ao. Tungkhung khok teh ka kang lahun e hmai lah ao.

<sup>10</sup> A minhmai dawk hoi hmaiang a tâco. Touklek thai hoeh e naw ni a thaw a tawk awh teh, touklek thai hoeh e naw ni a hmalah a kangdue awh. Lawkceng hanelah cauknaw hah kadai lah ao.

<sup>11</sup> Hatnavah, kica ni puenghoi dei e lawk dawk ka khet navah, hote sarang hah a thei awh teh, a tak hah hmai hoi a sawi awh teh, a raphoe awh.

<sup>12</sup> Alouke sarang teh uknaeram kê tawn awh hoeh eiteh, atueng khoe e a pha hoehnahlan totouh a hring awh.

<sup>13</sup> Hote tangmin e vision dawk teh, tami hoi kâvan e buet touh tâmai a kâcui teh a kum kacue e koe a tho. A kum kacue e hmalah ahni hah a thokhai awh.

<sup>14</sup> Kho tangkuem kaawm e lawk cawngca kapan e tami pueng hah uk sak hanelah, ahni koe uknaeram kê, lawkcengnae hoi bawilennaeh hah poelah ao. A uknaeram teh akangning, a ram teh rawk thai mahoe.

*Daniel vision caksaknae*

<sup>15</sup> Kai Daniel teh hote vision ni ka lungthin dawk runae na poe teh, ka muitha teh a cingou.

<sup>16</sup> Ateng kangdout e buet touh koe ka cei teh, atu e ka hmu e naw hah bangtelamaw telah ka pacei.

17 Ahni ni hete sarang pali touh teh talai van ka tâcawt hane ram pali touh hah doeh.

18 Hatei, a lathueng poung e Cathut e tami kathoungnaw ni hote uknaeram coe awh vaiteh, a yungyoe a pang awh han telah atipouh.

19 Hat toteh, alouke sarangnaw hlak taki hoe ka tho niteh, sumhâ hoi rahum khokpatin ka tawn niteh, vekrasen lah a kei a ca teh, canawi e hah a khok hoi ka coungroe e sarang teh bangmouh a deingai nah aw tie thoseh,

20 A lû dawk e ki hra touh teh bangmouh a dei ngai na aw tie hai thoseh, a hnukkhu ka cawn niteh, ahmaloe e ki kathum touh hah din ka phawng niteh, puenghoi lawk dei thainae pahni hoi mit ka tawn e, a huinaw hlak taranhawinae minhmai ka tawn e ki hateh bangmouh a deingai nah tie hah panue han ka ngai.

21 Ka khet lahun navah, a kum kacue e buet touh a tho teh,

22 a lathueng poung e Cathut e tami kathoungnaw koe uknaeram teh poe lah ao. Hahoi, uknaeram pang hanelah tami kathoungnaw hanelah khoe e atueng teh a pha.

23 Ahni ni, apalinae sarang teh talai van kaawm e ram puenghoi hai kâvan hoeh e apalinae uknaeram doeh. Hete ni talai uknaeram pueng vekrasen lah kei vaiteh a coungroe han.

24 Hote uknaeram dawk hoi ka cawn e ki hra touh hateh, ka tho hane siangpahrang hra touh hah doeh. Ahnimouh hnukkhu alouke siangpahrang a tho han. Ahmaloe e siangpahrangnaw hoi kâvan hoeh. Ahmaloe e siangpahrang kathum touh hah a pabo han.

<sup>25</sup> A lathueng poug e Cathut hah taran vaiteh, puenghoi lawk a dei han. Atueng hoi kâlawk hah pathai hanlah a panki han. Atueng buet touh, atueng kahni touh, atueng tangawn totouh kâ a tawn han.

<sup>26</sup> Hathnukkhu lawkcengnae ao han. Hattoteh kâ a tawnae takhoe pouh lah awm vaiteh, khoeroe raphoe lah ao han.

<sup>27</sup> Kalvan rahim kâtawnae, uknaeram, hoi lentoenae naw teh, a Lathueng Poug e Cathut e a tami kathounghaw koe uknaeram poe lah ao han.

<sup>28</sup> Het totouh heh, deicainae doeh toe. Kai Daniel teh ka lung a puen teh, ka minhmai pan hoeh. Hatei nakunghai, ka hmu e visionnaw hah ka lung thungvah ka pâkuem.

## 8

### *Tutan hoi hmaetan kamnuenae*

<sup>1</sup> Siangpahrang Belshazzar a bawinae a kum pâthum nah, kai koe vision a kamnue. Kai Daniel koe ahmaloe a kamnue hnukkhu bout a kamnue.

<sup>2</sup> Elam ram Shushan siangpahrang im, Ulai palang teng ka o navah vision teh a kamnue.

<sup>3</sup> Ka khet navah, ki kahni touh ka tawn e tutan buet touh palang rai a kangdue. Ki roi teh kâvan hoeh, buet touh teh bet a saw. Bet ka saw e ki teh a hnukkhu ka cawn e lah ao.

<sup>4</sup> Hote tu ni kanîloum, atunglah, akalah a deng dawkvah, bangpatet e saring ni hai ngang thai hoeh. Ahnie kut dawk hoi apinihai a hlout sak thai hoeh dawkvah, a ngai e patetlah a sak teh, ka lentoe poug e lah ao.

<sup>5</sup> Hote konglam hah ka pouk navah, mit roi e rahak vah ki buet touh ka cawn e hmaetan buet touh teh, kanîloumlah hoi a tâco teh talai coungroe laipalah talai van pueng a katin.

<sup>6</sup> Ki kahni touh ka tawn ni teh palang namran lah kaawm e tutan aonae koe, puenghoi a yawng teh,

<sup>7</sup> ateng a pha toteh, puenghoi a lungkhuek dawkvah, tutan hah a deng teh tutan e ki kahni touh e hah, letlet a khoe pouh. Tutan ni a ngang thai hoeh dawkvah, hmaetan ni tutan hah talai dawk a parawp teh, a coungroe. A kut dawk hoi tutan hah apinihai lawm thai hoeh.

<sup>8</sup> Hottelah hoi, hote hmaetan teh, puenghoi a rounng teh a len. A tha ao lahunnah, a ki a lawt pouh. Hote ki hmuen dawk ki pali touh a cawn teh, kalvan kahlî pali touh koe lah, a kangvawi aw.

<sup>9</sup> Hote ki pali touh thung dawk buet touh e ki dawk alouke ki kang bout a cawn. Akalah hai thoseh, kanîtholah ai thoseh, ka lentoe e ram koe lahai thoseh, a kangvawi teh, puenghoi lennae koe a pha.

<sup>10</sup> Kalvan kaawm e koe totouh a rounng teh, hawvah kaawm e atangawnnaw hoi âsi tangawn naw teh, talai van a pabo teh, khok hoi a coungroe.

<sup>11</sup> Hothloilah, kalvan e kaawm e koe totouh a kâoup teh, hnintangkuem sak lah kaawm e hmaisawi thuengnae hah a takhoe teh thoungnae hmuen hah a raphoe han.

<sup>12</sup> Payonnae dawk hnintangkuem sak e hmaisawi thuengnae hoi ransanaw hoi hote ki koe



poelah ao teh, lawkkatang hah talai totouh a pabo teh, tânae a hmu.

<sup>13</sup> Hatdawkvah, tami kathoung buet touh ni, dei e lawk hah ka thai. Alouke tami kathoung ni ahmaloe lawk a ka dei e tami kathoung koe, thoungnae hmuen hoi ransanaw hmaisawi thuengnae takhoe hanelah thoseh, coungroe hanelah hnintangkuem sak e raphoe e yonnae hoi thoseh, kâkuen e vision teh nâtotouh han na maw atipouh.

<sup>14</sup> Ahmaloe e ka dei e ni, hnin 2300 totouh a ro han. Hathnukkhu, kathoung bawkim hah bout a pâsu aw h han atipouh.

### *Gabriel ni vision deicainae*

<sup>15</sup> Kai Daniel ni vision ka hmu e hah panue hanelah, kâyawm lahun nah tami hoi kâvan e buet touh ka hmalah a kangdue.

<sup>16</sup> Hatnavah, Ulai palang koehoi tami e lawk ni, Gabriel hete tami koe vision deingainae hah dei pouh haw, tie lawk ka thai.

<sup>17</sup> Kai ka kangdue nah kai koe rek a hnai toteh, ka taki teh ka tabo. Ahni ni, hei! Tami capa, thai panuek haw. Hete vision teh atueng poutnae hoi kâkuen e doeh a ti.

<sup>18</sup> Hottelah, a dei lahunnah talai daw k mat ka i. Ahni ni a kut hoi na tek teh, na kangdue sak.

<sup>19</sup> Ahni ni, lungkhueknae atueng, apoutnae koe lah kaawm hane naw hah bout ka dei han rah. Bangkongtetpawiteh, atueng khoe e daw k poutnae kaawm han.

<sup>20</sup> Ki hra touh ka tawn e tutan teh Media siangpahrang doeh.

<sup>21</sup> Hmaetan teh Grik uknaeram doeh. Mit rahak ka cawn e ki hateh, ahmaloe e siangpahrang doeh.

<sup>22</sup> Hote ki a lawt teh, hmuen dawk ki pali touh a cawn tie teh, ahnie uknaeram dawk hoi ram pali touh a tâco han. Hatei, ahmaloe e ram patetlah bahu tawn awh hoeh.

<sup>23</sup> Ahnimae uknaeram atueng abawnae koe lah, kê katapoenaw e hawihoehnae akuep nah tueng toteh, taranhawinae minhmai, dumyennaek ka panuek e siangpahrang buet touh a tâco han.

<sup>24</sup> Hote siangpahrang teh, athakaawme lah ao han. Hatei, amae bahu nahoe. Puenghoi raphoe tânae a hmu awh han. Atha kaawm e taminaw hoi tami kathoungnaw hah a raphoe han.

<sup>25</sup> Tâ hanelah a dumyen han, amahoima, ka taluepoung lah a kâpouk han. Roumnae ao ati awh navah ahni ni taminaw hah raphoe vaiteh, ahni ni, bawinaw e Bawi hah a taran han. Hatei, ahni teh, raphoe lah ao han. Tami e bahu hoi mahoeh.

<sup>26</sup> Nang koe na poe e amom hoi tangmin e vision teh, ahman dawkvah tacikkin loe. Bangkongtetpawiteh, ato hmalah torei a kuep han.

<sup>27</sup> Hattoteh kai Daniel teh, nget tawn laihoi ka pataw. Hathnukkhu ka thaw teh, siangpahrang thaw bout ka tawk. Ka hmu e vision ni puenghoi kângai na ru sak. Hothateh, apinihai panuek thai hoeh.

*A taminaw hanlah Daniel ratoumnae*

<sup>1</sup> Ahasuerus capa, Darius, Medes catoun hah, Babilon siangpahrang lah a bawinae a kum pahni navah,

<sup>2</sup> profet Jeremiah koe BAWIPA ni poe e a lawk, Jerusalem kho a rawk teh, kum 70 touh a ro han tie hah kai Daniel ni cakathoung lahoi ka panue.

<sup>3</sup> Hatdawkvah, rawca ka hai, buri ka kho, hraba kâphuen teh Cathut koe ratoum laihoi kahei,

<sup>4</sup> Hottelah, Cathut koe kâpâpho laihoi ka ratoum e teh, ama ka lungpataw niteh, a poe e kâpoelawknaw ka tarawi e koe, a lawkkam kacak ni teh lungmakung, ka lentoe niteh, takikathopounge Cathut,

<sup>5</sup> na patoun e hoi kâ poe e dawk hoi ka cei payon awh teh, ka payon awh toe. Kamsoum hoe lah kho ka sak e teh, nang na taran awh toe.

<sup>6</sup> Siangpahrangnaw, kahrawikungnaw, napanaw hoi ram thung kaawm naw koe, nange kâ lahoi lawk ka dei e profetnaw e lawk hai ka ngai awh hoeh toe.

<sup>7</sup> Oe Bawipa lannaeh teh nange doeh. Nang na taran kecu dawk na pâlei teh, ram hnai ram hlanae koe, khoram tangkuem kaawm e Judahnaw, Jerusalem kho kaawm e Isarelnaw puenghoi kaimouh teh sahnin e patetlah kaya awh toe.

<sup>8</sup> Oe Bawipa, nang koe ka yon awh kecu dawk, kaimae siangpahrang, kahrawikungnaw, napanaw hoi kaimouh teh ka kaya awh toe.

<sup>9</sup> Kaimouh ni nang na ka taran nakung-hai, lungmanae hoi ngaithoumnae teh, kaimae

Cathut nama e doeh.

<sup>10</sup> Maimae Cathut ni profetnaw hno lahoi maimouh koe na poe e tarawi hane kâlawknaw hah banglahai ngai laipalah ka o awh toe.

<sup>11</sup> Atangcalah Isarelnaw pueng ni na lawk ka ngai awh laipalah, lam ka payon awh teh, kâlawk ka tapoe awh toe. Hatdawkvah, Cathut e san Mosi e kâlawk dawk thut lah kaawm e thoebonae teh, kaimouh lathueng awi lah ao toe.

<sup>12</sup> Kaimouh koe dei e lawk hoi lawkcengkungnaw koe dei e lawk, rawknae kalenpoung teh kaimouh lathueng a phasak toe. Bangkongtetpawiteh, Jerusalem vah rawknae phasak e patetlah kalvan rahim alouke ram dawk phat sak boihoeh.

<sup>13</sup> Mosi e kâlawk dawk thut tangcoung patetlah rawknae pueng teh kaimouh lathueng a pha toe. Hatei, payonpakainae kamlang takhai teh, a lawkkatang panue thai nahanelah, BAWIPA Cathut koe kâhet awh hoeh toe.

<sup>14</sup> Hatdawkvah, Cathut ni rawknae hah a sin teh, maimae lathueng a pha sak e doeh. Bangkongtetpawiteh, a lawkngai awh hoeh nakunghai, Cathut teh, a lan, maimouh lathueng hno a sak e pueng teh a thuem doeh.

<sup>15</sup> Atuvah, Oe BAWIPA Cathut, Izip ram thung hoi thaonae kut hoi a taminaw katâcawtkhaikung hoi, atu totouh minhawi min kamthang nahanlah kasakkung, kaimouh teh, ka yon awh toe, hno kahawihoe hoi ka sak awh toe.

<sup>16</sup> Oe Bawipa, na lannae pueng patetlah lungkhuek lungphuennae teh, kathoung mon, Jerusalem kho daw hoi na takhoe pouh haw

telah ka kâhei. Bangkongtetpawiteh, kaimae yonnae hoi mintoenaw e yonnae kecu dawk Jerusalem kho hoi na taminaw teh tengpam kaawm e naw koe pathoe han kawilah ka o aw h toe.

<sup>17</sup> Hatdawkvah, Oe Cathut, na san kai ni ka hei e hoi ka ratoum e hah na thai pouh haw. Bawipa ama hane kecu dawk, kingkadi e a thOUNGNAE hmuen koe na minhmai angnae ni pheng ang sak haw.

<sup>18</sup> Oe Cathut, hnâpakeng nateh thai haw. Na mit padai nateh, kaimae rawknae hoi na min lahoi phung e khopui hah khenhaw! Kaimouh teh, mae hawinae kâuep aw h hoeh, ka lentoe e na lungmanae daw k hoi doeh nama koe ka ratoum aw h.

<sup>19</sup> Oe Cathut na thai pouh haw. Oe Cathut yonnae na ngaithoum haw. Oe Cathut thai nateh sak haw. Nama hane daw k rap aw m hanh. Bangkongtetpawiteh, nama e kho, nama e taminaw teh na min lahoi phung e doeh, telah a ratoum.

*Yat 70 sut deingainae*

<sup>20</sup> Hottelah, kama e yonnae hoi ka tami Isarelnaw e yonnae pâpho laihoi ngaithoum nahanelah kâhei ratoum laihoi, Cathut hmalah Cathut e mon kathoung hanelah ka kâhei lahun-nah,

<sup>21</sup> ratoum laihoi lawk ka dei lahunnah, yampa e vision daw k kamnuek e Gabriel karangpoung lah kamleng laihoi tangminlah thuengnae tueng nah kai koe a tho teh,

<sup>22</sup> na ka panue sak hnukkhu, Daniel, nang ni panuenae apap nahanelah, nang koe ka tho toe.

<sup>23</sup> Na ratoum tahma vah kâ poelah ao dawkvah, nang koe dei hanelah kai ka tho toe. Nang teh puenghoi pahren ka tho e lah na o. Hatdawkvah vision thai panuek nahane kâ ao.

<sup>24</sup> Kâtapoenae pout sak hane hoi, yonnae pout sak hane, payonae dawk kâmaihawinae sak hane, payonnae thounsak nahane hoi, a yungyoe lannae thokhai hane hoi, vision hoi sutdeilawk kin hane hoi, hmuen kathoung poung satui awi hanelah, na taminaw hoi kho kathoung hanelah yat 70 touh tâtueng e lah ao toe.

<sup>25</sup> Hatdawkvah, Jerusalem kho bout sak hanelah kâ poe hnin hoi Khrih Bawipa totouh yat 7 touh hoi yat 62 touh a ro han tie hah panuek lawih. Rucatnae tueng dawk lamnaw hoi tapang sak lah ao han.

<sup>26</sup> Hote yat 62 aloum hnukkhu, Khrih teh kâ hmawt laipalah thei lah ao han. Hathnukkhu ka tho e Bawi hoi taminaw ni khopui hoi hmuen kathoung hah raphoe awh vaiteh, tuikalen thonae lahoi rawknae ao han. Apout totouh kâtuknae awm vaiteh, rawknae teh pouk tangcoung lah ao.

<sup>27</sup> Yat touh hanelah taminaw hoi lawkkam sak awh vaiteh, hote a yat tangawn navah, thuengnae hoi poenae hah a pout sak han. Panuet ka tho poung e a som dawk karaphoekung phat vaiteh, poutnae koe ka phat hanelah pouk tangcoung e totouh lungkhueknae teh ahni dawk awi hanlah ao han telah atipouh.

## 10

*Daniel ni vision bout a hmu*

<sup>1</sup> Persia siangpahrang, Sairas a bawinae a kum thum nah Belteshazzar telah phung e Daniel koe lawk pâpho buet touh a tho. Hote lawk teh ahman, taran tuknae kalenpoung hoi kâkuen e lah ao. Hote lawk thaipanueknae teh vision lahoi ahni koe a tho.

<sup>2</sup> Hatnae tueng navah, kai Daniel teh yat thum touh rawca hai laihoi ka o.

<sup>3</sup> Yat thum touh aloum hoehroukrak, bu ka cat hoeh, moi ka cat hoeh, misur hai ka patek hoeh, satui hai khoeroe kâhluk hoeh.

<sup>4</sup> Apasueke thapa 24 hnin vah palangpui Hid-dekel teng ka o lahunnah,

<sup>5</sup> ka radoung boteh, loukloukkaang e khohna ka khohnat niteh, Uphaz suitaisom kâyeng e tami buet touh ka hmu.

<sup>6</sup> Atak teh topaz talung hoi a kâvan. A minhmai hai sumpapalik e patetlah ao. A mit hai hmaiim patetlah ao. A kutkhoknaw teh, loukloukkaang e rahum e rong hoi a kâvan. A lawk teh tami moikapap lawk hoi a kâvan.

<sup>7</sup> Hote vision hah kai Daniel ni duengdoeh ka hmu. Kai hoi reirei kaawm e naw niteh, hmawt aw h hoeh. Ahnimouh niteh, puenghoi a taki aw h teh, a pâyaw aw h dawkvah, kâhro hanlah a yawng aw h.

<sup>8</sup> Kai teh, kamadueng sut ka o teh, hote ka lentoe e vision ka hmu navah, ka minhmai a mathoe teh, tha khoeroe ka tawn hoeh, pouk ka kâsawp.

<sup>9</sup> Hatnavah, lawk hah ka thai. A lawk hah ka thai pouh teh, lawk a dei lahun navah, minhmai hoi talai rekkâbet lah ka tabo teh mat ka i.

*Persia hoi Grik sut deinae*

<sup>10</sup> Hatnavah kutvang ni na tek, khokpakhu hoi kuttabei hoi ka kâva.

<sup>11</sup> Ahni ni, pahren hanlah kaawm poung e Daniel, ka lawk na thai panuek nahanlah kangdout haw. Nang koe kai heh patoun lah ao teh, atu ka tho toe atipouh navah, kai teh nouknouk pâyaw laihoi ka kangdue.

<sup>12</sup> Hatnavah, ahni ni Oe Daniel, taket hanh. Thaipanuek nahane hoi, Cathut hmalah kârahnoum hanelah na kâhmoun hnin hoiyah kamtawng teh, nange lawk hah ka thai toe. Hote na lawk daw koe kai ka tho e doeh.

<sup>13</sup> Persia uknaeram kaukkung ni hnin 21 touh thung kai hah na ngang. Hahoi, kahrawikung kacuenaw thung daw buet touh lah kaawm e Maikel hah kai na kabawp hanelah a tho. Bangkongtetpawiteh, Persia siangpahrangnaw koe kai kama dueng sut ka o.

<sup>14</sup> Atuteh, na miphunnaw koe hmalah ka tho hane kawinaw hah na panue nahanelah, kai ka tho toe. Hete vision teh ato hmalae tueng hoi kâkuen e doeh telah a ti.

<sup>15</sup> Hottelah a dei hnukkhu ka lû ka saling teh lawkdei thai laipalah ka o.

<sup>16</sup> Hatnavah, tami capa hoi kâvan e buet touh ni ka pahni hah a tek teh, ka pahni ka ang teh, ka hmalah kangdout e koe, ka Bawipa vision kecu daw puenghoi ka khang toung dawkvah, ka tak daw tha ka tawn hoeh toe.

<sup>17</sup> Na san ni a Bawipa hoi bangtelavai lawk a dei thai. Atu patenghai kai daw tha khoeroe awm hoeh. Kâha meimei a phout toe ka ti pouh.



18 Hat toteh, tami hoi kâvan e ni bout na tek teh, tha na poe.

19 Pahren ka tho poung e tami, taket hanh. Rounnae nang koe awmseh. Na tha awm sak. Thaonae hoi kawi haw na ti pouh. Hottelah a dei lahunnah ka tha ao teh, ka Bawipa dei haw, nang ni tha na o sak toe ka ti pouh.

20 Ahni ni, nang koe kai kathonae hah na panue ou. Persia ram kaukkung taran tuk hanelah bout ka ban han. Kai ka ban hnukkhu Grik ram kaukkung bout a tâco han.

21 Hatei, Cakathoung dawk mitnout tâ e teh na dei pouh han rah. Hete kong dawk nang kahrawikung Maikel hloilah apihai kai koelah kangdoutkhai e awm hoeh.

## 11

1 Medes siangpahrang, Darius a bawinae a kum pasuek navah, a uknaeram caksak hane hoi thao sak nahanelah ka kampangkhai.

2 Atuteh, katang e ka dei han toe. Persia ram ka uk hane siangpahrang kathum touh a tâco han rah. Apalinae siangpahrang teh ahnimanaw hlak hoe a tawnta han. Hottelah a tawnta thai teh, a tha ao dawkvah, Grik ram tuk hanelah tamipuong a hroecoe han.

3 Hatnavah, athakaawme siangpahrang buet touh a tâco han. Ahni ni kâtawnnae hoi uk vaiteh, a ngai e patetlah a sak han.

4 Ahni a tâco hnukkhu hoi a ram rawk vaiteh, pali touh lah a kêrei awh han. Hatei, ka ukkung-naw teh a catounnaw nahoeh, kâtawnnae hoi a uknaeram thung e nahoeh. Bangkongtetpawiteh,

a ram teh a kâbawng toung dawkvah, ayânaw poe lah ao han.

*Atunglae hoi akalae siangpahrangnaw kâhruetcuet poenae*

<sup>5</sup> Hat toteh, akalae siangpahrang teh a thao han. Hatei, a bawinae thung dawк buet touh teh ahni hlak a tha awm vaiteh, amae ram hah kalen e bahu hoi a uk han.

<sup>6</sup> Atueng a saw toteh, huiko a kâsak awh han. A kâpo awh nahanlah akalae siangpahrang canu teh atunglae siangpahrang koe kâtawinnae a poe han. Hatei, hote napui e kâtawinnae teh cak mahoe. Hote siangpahrang hoi a catoun hai cak mahoe. Siangpahrang canu hai, ahni ka thak e naw hai, ahnie canaw hai, hatnae tueng nah ahni kabawm e naw hai, thei hanlah ao han.

<sup>7</sup> Hote siangpahrang canu e miphun dawк e buet touh ni ahnie hmuen dawк a kangdue han. Ahni ni atunglae siangpahrang hah tuk vaiteh, khothung kâen vaiteh, khocanaw hah a tuk vaiteh a tâ han.

<sup>8</sup> Ahnimae cathutnaw, hlun e meikaphawk-naw, aphu kaawm e sui manang, ngunnaw hah Izip ram lah be aphu awh han. Atunglae siangpahrang hlak akalae siangpahrang teh a kum bet a saw han.

<sup>9</sup> Atunglae siangpahrang hai akalae siangpahrang uknaeram thung a kâen han. Hatei, ama ram lah bout a ban han.

<sup>10</sup> A capanaw ni bout thaw awh vaiteh, ransanaw moikapap kamkhueng sak vaiteh a tho awh han. Tâ awh vaiteh, ahnie kho thung totouh runae a poe awh han.

<sup>11</sup> Akalae siangpahrang teh a lungkhuek dawkvah, atunglae siangpahrang hah a tuk han. Hatei, tami moikapap hah a taran kut dawka a poe han.

<sup>12</sup> Tami moikapap a ceikhai awh toteh, kâoup vaiteh, a thong moikapap ka thet nakunghai, kâ a tawnae cak mahoe.

<sup>13</sup> Bangkongtetpawiteh, atunglae siangpahrang bout thaw vaiteh, ahmaloe e hlak kapap e taminaw hah pâkhueng vaiteh, kum nâyittouh ne a ro torei ransanaw hoi senehmaica hoi a tho awh han.

<sup>14</sup> Hatnae tueng dawkvah, akalae siangpahrang ka taran e apap han. Na miphunaw thung dawka e tapungaw ni vision akuap nahanelah thaw awh vaiteh, rawknae koe a pha awh han.

<sup>15</sup> Atunglae siangpahrang ni tho vaiteh kho rapannaw sak awh vaiteh, kacaklah kâkalup e khonaw hah a tuk awh han. Akalae senehmaica thaonae ni ngang thai mahoe, hmoun e ransanaw ni hai ngang thai nahanelah tha tawn awh mahoe.

<sup>16</sup> Ka tuk e niteh, amahmawka a tuk dawkvah, ahnie hmalah apihai kangdout thai hoe. Ram kahawi hah raphoe vaiteh, ka lentoe e ram lah a kangdue sak han.

<sup>17</sup> A uknaeram buemlah thaonae hoi a kâen hanlah a kâcai teh, akalae siangpahrang hoi kâhuiko hanelah a sak han. A canu poe e lahoi raphoe hanelah a kâcai eiteh, a pouknae patetlah awm hoe. Banghai cungkeinae awm hoe.

<sup>18</sup> Hahoi, tuilumnaw koe lah kamlang vaiteh, tuilumnaw hah a tuk han. Hatei, ransabawi buet

touh ni min mathoenae a dei e hah, katukkung-naw koe letlang a bo sak han.

<sup>19</sup> Hote bawi hai ama kho bout a ban hnukkhu a kamthui teh, a rawp teh a kahma.

<sup>20</sup> Hote bawi e hmuen dawk tami buet touh sungren poung e uknaeram dawk, tamuk ka cawng e a kangdue han. Hatei, taran tuknae lungkhueknae dawk hoi laipalah, a kahma han.

<sup>21</sup> Ahnie hmuen dawk yuemkamcu hoeh e, bari kaawm hoeh e, dudam kamcu e tami a tâco han. Ahni ni tânae lahoi laipalah pasawtpanepnae lahoi uknaeram hah a la han.

<sup>22</sup> A hmalah kaawm e naw teh, tui kalen thaonae lahoi pâyo sak lah ao vaiteh, koug a rawk awh han. Lawkkam e bawi hai a rawk han.

<sup>23</sup> Bangkongtetpawiteh, lawk ka kam e bawi teh, lawkkam a raphoe dawkvah, tami younca hoi a tho eiteh, a tha ao han.

<sup>24</sup> Ram kahawi dawk tuk laipalah a kâen han. Lawp e hnopainaw hah ayânaw a rei han. Mintoenaw ni patenghai a sak awh boihoeh e hah a sak han. Kacakpounge kho rapanimnaw hah lawp hanelah kasawlah a kâpouk han.

<sup>25</sup> Puenghoi kapap e ransanaw hoi, akalae siangpahrang hah tuk vaiteh, amahoima thaonae hah a hroecoe han. Akalae siangpahrang ni hai moikapap ni teh athakaawme ransanaw hoi taran tuk hanlah a kâhroecoe awh ei, ngang thai awh mahoehe. Bangkongtetpawiteh, kahawihoehe pouknae a tawn awh han.

<sup>26</sup> Siangpahrang koe kocatnetnaw ni ama tuk hanlah, letlang a kâcai awh. Hatei, a ransanaw teh, be kahmat vaiteh, tarankâtuknae koe tami

moi a due aw h han.

<sup>27</sup> Hote siangpahrang roi teh kahawihoehe pouknae a tawn roi teh, caboi buet touh koe laithoe a dei roi han. Hatei, a pouknae coung pouh mahoe h. A pouknae teh khoe tangcoung e a tue daw k ka phat mingming han.

<sup>28</sup> Hahoi atunglae siangpahrang teh hnopai moikapap hoi ama ram lah a ban navah, kathoung lawkkamnae hah taranna lungthin a tawn e patetlah a sak vaiteh, ama ram lah bout a ban han.

### *Akalae siangpahrang dudamnae*

<sup>29</sup> Khoe e tueng daw k bout ban vaiteh, akalah bout a tho han. Hatei, ahmaloe e patetlah nahoe h. A hnukkhu e patetlah hai nahoe h.

<sup>30</sup> Bangtelane tetpawiteh, Kittim longnaw ni ahni tuk hanlah a tho aw h han. Hatdawkvah puenghoi a lungpataw teh, lungkhuek laihoi bawkim kathoung tuk hanelah bout tho vaiteh, rawknae hah a sak han. Hottelah lawkkam kathoung katapoenaw hoi a kâhuiko aw h han.

<sup>31</sup> Ransanaw ni tuk pouh vaiteh, kathoung hmu en hah a khin sak aw h han. A hnintangkuem sak e thuengnae hah takhoe aw h vaiteh, panuethopoung rawknae kathokhaikung hah a pâhung aw h han.

<sup>32</sup> Lawkkam ka taran e naw teh lawk dei thoumnae lahoi a rawk aw h han. Hatei, Cathut ka panuek e taminaw teh thasainae hoi hno a sak thai aw h han.

<sup>33</sup> Taminaw thung daw k a lungkaangnaw ni tami kapapnaw teh a cangkhai aw h han. Hatei,

hnin kasawlah tahloi hoi theinae, hmaisawinae, san lah mannae, lawpnae hoi a rawp aw h han.

<sup>34</sup> A rawp aw h toteh, kabawpnae youn touh bout a coe aw h han. Taminaw teh lawk dei thounnae koe a kâbang aw h han.

<sup>35</sup> A lungkaang e tami tangawn hai a rawp aw h han,, a thoung aw h teh, toun hoeh nahanlah poutnae tueng totouh a sak han. Hot hateh, atueng khoe e totouh hane doeh.

<sup>36</sup> Siangpahrang buet touh teh, amamouh ni a ngai e patetlah a sak han, cathutnaw pueng hlak kâawmrasang vaiteh, cathutnaw e Cathut hah a taran han. Dudamnae lawk a dei han. Lungkhueknae aku ep hoehroukrak a tâ han. Pouk tangcoung e patetlah sak roeroe han.

<sup>37</sup> Ahni teh mintoenaw e Cathut hai, napui ngainae hai, alouke cathutnaw hai banglahai noutna hoeh. Tami pueng hlak amahoima a kâawmrasang han.

<sup>38</sup> Hote cathutnaw e hmuen daw k, rapan cathut, mintoenaw ni panue hoeh e cathut hah tawm vaiteh, sui, ngun, talung, ngai kaawm e hnonaw hah a thueng han.

<sup>39</sup> Kacake rapannaw hai, Jentelnaw e cathut hai sak vaiteh, a bawilenna e apung sak han. Taminaw uknaeram kâ poelah awm vaiteh, tawnta nahanlah talai hah a kârei aw h han.

### *Akalae siangpahrang tânae*

<sup>40</sup> Atueng poutnae tueng nah, akalae siangpahrang ni ahni hah a tuk han. Atunglae siangpahrang nihai, ranglengnaw, marangnaw,

marangransanaw, longnaw hoi bongparui patetlah tho awh vaiteh, hote ram hah reprep a coungroe han.

<sup>41</sup> Khet kahawi e ram dawkhai a kâen awh han. Ram moikapap a lawp awh han. Hatei, Edom ram, Moab hoi Amon kahrawikungnaw teh ahnie kut dawkhai a hlout awh han.

<sup>42</sup> Ram pueng dawkhai a ram pakaw vaiteh, Izip ram hai hlout mahoe.

<sup>43</sup> Hote ram dawkhai kaawm e sui, ngun, apu kaawm e hnonaw hah a la han. Libianaw hoi, Ethiopianaw hai ahni hnuk a kâbang awh han.

<sup>44</sup> Hatei, kanîtho lahoi, atunglah hoi kamthang a thai navah a lungpuen teh, tami moikapap thei hanelah puenghoi lungkhuek lahoi a tho han.

<sup>45</sup> Tuipui rahak vah ka lentoe niteh, kathounge mon dawkhai o nahan im a sak teh, kabawmkung awm laipalah, rawknae koe a pha han.

## 12

### *Poutnae lawk deicainae*

<sup>1</sup> Hatnae tueng dawkvah, na miphunnaw kangdoutkhaikung Maikel teh a tâco han. Miphun a kamtawngnae koehoi hote tueng totouh kaawm boihoe e runae teh a tho han. Hatnavah, cauk dawkhai min pakhum lah kaawm e na miphun pueng teh, rungngang lah ao han.

<sup>2</sup> Hatnae tueng navah, vaipuh dawkhai ka ip tangcounghaw teh a kâhlah awh han. Atangawn teh a yungyoe hringnae koelah thoseh, atangawn teh a yungyoe yeirai kayanae koelah thoseh a kâhlah awh han.

<sup>3</sup> A lungkaangnaw teh lathunglae ka ang e patetlah a ang aw h vaiteh, tami kapap lanna e lamthung ka dawn sak e naw hai âsinaw patetlah pout laipalah a ang aw h han.

<sup>4</sup> Nang Daniel teh, atueng abaw totouh hete lawknaw hah khan nateh, cauk hah tacikkin haw. Tami kapap ni hote ca touknae lahoi lungangnae apung han ati.

<sup>5</sup> Hathnukkhu, kai Daniel ni ka khet navah, alouke kahni touh, tui kongteng avangvanglah a kangdue roi e hah ka hmu.

<sup>6</sup> Buet touh e nyah hete kângai ka ru hnonaw akuep nahanlah nâsittouh maw ao han telah loukloukkaang e ka khohnat niteh, tui van kaawm e tami hah a pacei.

<sup>7</sup> Loukloukkaang e ka khohnat niteh, tui van kaawm e tami ni, atueng buet touh, atueng kahni, atueng tangawn touh a ro han. Tami kathoungnaw e hnotithainae hah kho tangkuem kahei hnukkhu, hete hnonaw pueng hai apout han telah a kut roi hoi kalvan lah a dâw teh, a yungyoe kahring e Cathut koe thoe a kâbo e hah ka thai.

<sup>8</sup> Hote lawk hah ka thai teh, ka panue hoeh dawkvah, Bawipa hete hnonaw hah bangtelamaw akuep han telah ka pacei.

<sup>9</sup> Ahni ni, Daniel nang teh cet leih, hete lawk teh apout hnin totouh tacikkin lah ao toe.

<sup>10</sup> Tami moikapap teh thoungsak lah ao teh, pangawsak lah ao. Tamikathoutnaw teh haw-ihoehnae sak aw h vaiteh, buet touh ni boehai panuek aw h mahoe h. A lungkaangnaw niteh, a panue aw h han.



<sup>11</sup> A hnintangkuem sak e thuengnae takhoe teh, panuethhopounge karaphoekung a tâco hoi hnin 1,290 touh a ro han.

<sup>12</sup> A hnin 1,335 totouh ka ring niteh, ka phat e tami teh, a yawkahawi e lah ao.

<sup>13</sup> Nang teh, apout totouh na lamthung dawc cet haw. Na kâhat vaiteh, a hninnaw apout toteh, nama e râw coe hanelah bout na thaw han ati.

# **Thai Phum Holy Bible** **The Holy Bible in the Thaiphum Chin language of** **Myanmar**

Copyright © 2020 Batupuei Christian Fellowship

Language: Thai Phum (Chin, Thaiphum)

Translation by: Batupuei Christian Fellowship

copyright only valid in Myanmar; Public Domain elsewhere

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2024-05-01

---

PDF generated using Haiola and XeLaTeX on 15 May 2025 from source files dated 15 May 2025

84c7fe95-3b68-5ab6-b17e-a642d33ac078